

UCAPAN PERDANA MENTERI SEMASA MELANCARKAN KEMPEN KESELAMATAN JALAN RAYA NEGARA, MELALUI RADIO DAN TV MALAYSIA PADA 3HB JULAI, 1972

Saudara-saudara sekalian,

Malam ini kita memulakan peringkat pertama kempen Keselamatan Jalan Raya Negara bagi tahun 1972. Kempen ini yang diselenggarakan oleh Majlis Keselamatan Jalan Raya Malaysia berlangsung hingga akhir bulan Ogos ini.

Tahun ini kita memilih tema "Keselamatan Jalan Raya, Amalan Rukunegara." Saya fikir ini kena benar pada tempatnya untuk mengingatkan seluruh rakyat kepada Rukunegara sebagai panduan hidup setiap hari. Dengan mengamalkan keselamatan jalan raya dan mengikut peraturan-peraturan lalu lintas bermakna kita menghormati undang-undang iaitu salah satu dari prinsip-prinsip Rukunegara.

Tujuan utama kempen ini ialah supaya pengguna-pengguna jalan sentiasa mematuhi peraturan-peraturan lalu lintas dan panduan Jalan Raya atau Highway Code. Saya fikir amatlah mustahak pengguna-pengguna jalan raya sentiasa mengamalkan tatatertib dan bersikap halus serta berdisiplin demi keselamatan diri mereka dan orang-orang lain. Tegasnya, pengguna-pengguna jalan raya sama ada mereka memandu motokar atau berjalan kaki hendaklah waspada dan berhati-hati dan cuba sedapat-sedapatnya mungkin mengelakkan dari berlakunya apa-apa yang boleh membawa kemalangan jalan raya.

Saudara-saudara,

Peri mustahaknya Kempen ini dapat diukur dari statistik kemalangan jalan raya di negara kita. Semenjak tahun 1955, seramai 130,797 orang telah menjadi mangsa kemalangan jalan raya, di antara mereka seramai 9,810 orang telah terbunuh. Tahun lalu angka ini meningkat kepada 14,344 cedera dan 1,548 mati berbanding dengan 12,704 dan 579 pada tahun 1970. Ini sangatlah mendukacitakan.

Saya berasa sedih kerana walau pun berbagai-bagai aktiviti telah diadakan oleh Kerajaan mengenai pelajaran keselamatan jalan raya, pembaikan jalan dan kejuruteraan disamping tindakan undang-undang, namun kadar kematian dan kecederaan masih meningkat. Ini jelas membuktikan bahawa masih ramai lagi pengguna-pengguna jalan raya yang tidak mematuhi peraturan-peraturan lalu lintas. Tentulah kita semua bersetuju bahawa keadaan yang sia-sia itu tidak boleh dibiarkan berterusan.

Seperti diketahui, kemalangan jalan raya berlaku oleh beberapa sebab. Jika diteliti sebab-sebab itu jelaslah bahawa lebih 80% dari kemalangan berpunca dari kesalahan-kesalahan manusia, iaitu pengguna-pengguna jalan raya sendiri. Dengan itu nyatalah bahawa sekiranya semua pengguna-pengguna jalan raya mengamalkan sikap berhati-hati, maka tentulah banyak dari kemalangan-kemalangan itu dapat dielakkan. Tidak payahlah saya menerangkan dengan panjang lebar hanya saya suka menyatakan antara sebab-sebabnya ialah tidak lain dari memotong dengan cuai, memandu kenderaan terlalu laju dan tidak bertimbang rasa kepada orang lain.

Sebenarnya memandu atau menunggang kenderaan tidaklah semudah yang kita fikirkan. Jika kita ada alat untuk menguji kuasa pemikiran manusia semasa mereka memandu motokar umpamanya, nescaya dapat ditentukan betapa banyak konsentrasi fikiran yang diperlukan. Oleh sebab itu patutlah semua orang beringat dan berfikir semasa berada di jalan-jalan raya.

Saudara-saudara,

Salah satu dari projek-projek besar dalam Rancangan Malaysia Kedua ialah membina dan memperbaiki jalan-jalan raya untuk kemudahan pengangkutan dan juga untuk menyenangkan lalu lintas. Sementara langkah-langkah ini dilaksanakan, patutlah semua pengguna jalan raya memikirkan keselamatan diri mereka sendiri dan juga keselamatan orang-orang lain. Oleh itu mustahaklah pengguna-pengguna jalan raya sentiasa mematuhi peraturan-peraturan jalan raya dan bekerjasama dengan pihak-pihak berkuasa yang berkenaan untuk mengelakkan perbuatan atau kelakuan yang boleh menyebabkan kemalangan.

Selama tempuh kempen ini berjalan, pengguna-pengguna jalan raya akan diberi nasihat berkenaan berbagai-bagai aspek keselamatan jalan raya. Ini akan dibuat menerusi alat-alat sebaran

'am Kerajaan dan juga akhbar-akhbar. Berbagai-bagai kegiatan akan diadakan oleh Majlis-majlis Negeri dan Daerah seperti perhimpunan ramai, pamiran, tayangan filem, permainan lalu lintas, pertunjukan kereta remuk, pertunjukan kemalangan jalan raya secara olok-olok, mengadakan papan-papan tanda dan syarahan-syarahan umum. Saya harap semua orang akan turut serta menyaksikan kegiatan-kegiatan ini.

Saya suka menyeru semua pengguna-pengguna jalanraya supaya berikrar bahawa mereka tidak akan mengingkari undang-undang lalu lintas, dan akan menjadi pengguna-pengguna jalan raya yang sentiasa berdisiplin dan berhati-hati bukan sahaja untuk hari ini atau esok bahkan pada setiap masa. Kepada pemandu-pemandu kenderaan berat saya menyeru mereka supaya mematuhi had laju yang dikenakan ke atas kenderaan-kenderaan mereka dan had laju yang dikenakan dalam bandar. Janganlah semata-mata mengambil kesempatan kerana kenderaan mereka yang besar itu. Janganlah membawa muat lebih dan jagalah kenderaan dalam keadaan yang baik setiap masa.

Saudara-saudara,

Saya rasa amatlah mustahak bagi kita mendidik kanak-kanak berkenaan keselamatan jalan raya. Kanak-kanak yang dilatih sejak dari kecil akan menjadi pengguna-pengguna jalan raya yang tertib di masa hadapan. Saya gembira bahawa Majlis Keselamatan Jalan Raya menggalakkan sekolah-sekolah supaya menubuhkan Kelab Keselamatan Jalan Raya untuk murid-muridnya, dan hingga kini sebanyak 1,320 buah sekolah telah menubuhkan Kelab Keselamatan Jalan Raya. Saya fikir sekolah-sekolah yang masih belum menubuhkan kelab baiklah berbuat demikian juga semasa kempen ini.

Begitu juga guru-guru mestilah selalu memberi syarahan-syarahan keselamatan jalan raya untuk faedah murid-murid. Walaupun beberapa minit sahaja tiap-tiap hari, kanak-kanak akan sentiasa ingat akan kewajipan mereka yang mana memberi faedah kepada diri mereka sendiri dan negara.

Saya ingin sekali lagi mengingatkan orang ramai bahawa Kerajaan akan berbuat sedaya upaya bagi menjadikan jalan-jalan raya kita selamat. Tetapi Kerajaan juga berharap kepada semua supaya memainkan peranan masing-masing untuk mengurangkan angka

kematian dan kecederaan di jalan raya. Sentiasalah ingat cogan kata "Keselamatan jalan raya ialah keselamatan tuan-tuan dan keselamatan jalan raya bergantung kepada tiap-tiap seorang".

Saya mengambil peluang di sini mengucapkan setinggi-tinggi tahniah kepada Majlis Keselamatan Jalan Raya Malaysia dan juga Majlis Keselamatan Jalan Raya Negeri serta Jawatankuasa-jawatankuasa Keselamatan Jalan Raya Daerah di atas usaha-usaha mereka mengadakan kempen tahun ini. Saya juga mengucapkan terima kasih kepada pertubuhan-pertubuhan sukarela, firma-firma, media-media seranta Kerajaan, akhbar-akhbar dan orang-orang perseorangan di atas bantuan mereka di dalam serba serbinya untuk menjayakan kempen ini.

Dengan ini saya dengan sukacitanya merasmikan pelancaran Kempen Keselamatan Jalan Raya Negara tahun 1972.

Selamat malam.